



*Kamis, 03 Desember 2020*

**Ogen: Jeremia 39:11-14**



**"NGGELUH BEBAS"**



**I**bas zaman pandemi enda, kata bebas nggo jarang ibelasken. Engkai maka bage? Virus Corona erbanca kita lanai bebas i bas kai pe baik secara sosial, bagepe secara individu. Kai pe gundari enda nggo ibatasi ras lanai bebas gelah kita ipedauh arah penyebaran virus Corona enda. Nggeluh bebas i bas teks enda bali bagi kegeluhen Jeremia. Jeremia ibebasken arah kerina kiniseran nari i ja ia ilegi i bas kesain pengawal istana nari arah perentah Nebukadnesar man suruhenna panglima tentera Nebusaradan guna maba Jeremia. Nggeluh bebas siinanami Jeremia enda ipergunakenna nggeluh alu tenang i tengah-tengah jelma si enterem, ras tetap jadi pasu-pasu. Jeremia tetap ertanggungjawab ras tetap setia amin pe ia ibereken kegeluhen si bebas i tengah-tengah bangsa e.

Jeremia bebas i bas Ingan i ja ia itamakan (ipenjaraken) i bas ndahiken dahin si mehuli. Uga nge kita? Dibata nggo mereken kegeluhen banta guna sidalani, nggo nge kita nggeluh bebas sedekah enda? Uga nge carata gelah banci kita nggeluh bebas?. Situhuna,ngeluh bebas e nggo ibereken Dibata banta mulai kita tubuh i doni enda. Nggeluh bebas e ipercayaken Dibata banta guna ndalanken bagi singena ate Dibata. kinitekenta mabai kita ndahiken, ndalanken kerna si mehuli. Gundari, pilihien e ibereken man banta. Bagi belas-belas nina, **Hidup ini adalah pilihan, tentukanlah pilihanmu mulai dari sekarang.** Kita sierbanca ku arah ja ngeluh bebas e sipake. Jeremia ibebasken i bas tabanen nari. I bas kebebasan siidatkenna, ipakena guna ndalanken ras ndahiken bagi si ngena ate Di bata, jadi pasu-pasu ia bas kegeluhenna.

Man banta si enggo iberekenNa kegeluhen, pakekenlah geluhta alu ertanggungjawab i lebe-lebe Dibata. Ku ja pe perdalanta tetaplah jadi pasu-pasu man jelma si enterem. Amin gia, kondisita paksana la aman arah pandemi virus Corona, tetaplah nggeluh bagi si ngena ate Dibata. Nggeluh bebas ertina tetap i bas aturen si berlaku, hidup tenang, ras siinget Dibata i bas kerina situasita. Man banta enggo ibereken pilihien guna ngelakoken si bujur ntah si la bujur. Ingetlah Dibata la tunduh, Ia mperdiateken kita.